

# SINDIKAT PROFESIONALNIH FUDBALERA BIH

## *PLAN 10*




SINDIKAT PROFESIONALNIH  
FUDBALERA U  
BOSNI I HERCEGOVINI  
SINDIKAT PROFESIONALNIH  
NOGOMETASA U  
BOSNI I HERCEGOVINI  
СИНДИКАТ ПРОФЕСИОНАЛНИХ  
ФУДБАЛЕРА У  
БОСНИ И ХЕРЦЕГОВИНИ

# PLAN 10

Na narednim stranicama možete pročitati aktivnosti, koje predstavljaju PLAN "10" Sindikata profesionalnih fudbalera Bosne i Hercegovine.

Ovaj plan nastao je iz strateškog plana rada organizacije za period 2020-2024, a sačinjava deset konkretnih mjera i aktivnosti, za koje se Sindikat profesionalnih fudbalera Bosne i Hercegovine zalaže, a koje bi donijele boljitak bh. fudbala i unaprijedile položaj sportskih radnika, igrača, igračica i trenera.



## 1. NDRC / Arbitraža u skladu sa FIFA & FIFPRO pravilima

Trenutni sistem u bh. fudbalu stavlja strane fudbalere itrenere iznad domaćih. Oni se mogu koristiti međunarodnim pravnim aktima FIFA-e, dok domaći fudbaler i treneri koriste komisijeregistracionih i državnog Saveza kako bi ostvarilisvoja prava. Takav sistem ograničava prava domaćih sportista i privilegije strance.

SPFBiH se zalaže za primjenu FIFA pravila u tom pogledu i kao priznati socijalni partner ima priliku delegiranja svojih pravnika, odnosno predstavnika igrača, kako bi se temeljno načelo ravnopravnog saslušanja ispoštovalo. Dosadašnji sistem bh. fudbala sačinjava čak 17 prvostepenih i 3 drugostepena organa, putem kojih igrači mogu tražiti svoja prava. Nezavisna arbitraža jedan je od ključkih problema bh. fudbala, odnosno njeno nepostojanje.

U skladu s tim, potrebno je u cijelosti implementirati odredbe cirkulara FIFA & FIFPRO 1010., koji jasno opisuje minimalne standarde za formiranje nezavisne arbitraže, koja će omogućiti ravnopravan tretman kako domaćim, tako i stranim fudbalerima.

### AKTIVNOSTI:

- **Formiranje Udruženja/ Unije premijerligaških klubova kao uvjet mogućnosti delegiranja sudija od strane Klubova;**
- **Pravljenje i usvajanje pravilnika o arbitražnom sudu u skladu sa FIFA cirkularom 1010., i pravilnikom o nezavisnoj arbitraži FIFA-e;**
- **Pravljenje i usvajanje pravilnika o Etičkim vrijednostima i kriterijima delegiranja abitaru u novoformirani sud.**

## 2. NOVI STANDARDNI UGOVOR

Sindikat profesionalnih fudbalera u Bosni i Hercegovini sačinio je novi standardni ugovor, koji dodatno poboljšava i uređuje ugovorne-pravne odnose u bh. fudbalu. Godišnji odmor, medicinska zaštita, ustupanje, zaštita ličnih prava i anti-doping mjere neke su od stavki koje su obrađene našim prijedlogom, a prijedlog organizacije nastao je kao plod socijalnog dijaloga i pregovora FIFPRO-a i Evropske komisije.

### AKTIVNOSTI:

- **Usvajanje sačinjenog prijedloga standardnog ugovora za profesionalne igrače Premijer lige BiH i entitetskih rangova takmičenja.**
- **Usvajanje sačinjenog prijedloga standardnog ugovora za amaterske igrače entitetskih rangova takmičenja.**
- **Usvajanje sačinjenog prijedloga standardnog ugovora o djelu fudbalere na posudbama.**

Prijedlog standardnog ugovora imao bi fiksne datume završetka odnosno 31.12. u godini ili 30.6. s ciljem unificiranja ugovornih odnosa između klubova i igrača. Osim profesionalnih fudbalera, Sindikat razmišlja i o statusu amatera, kao i igrača koji se nalaze na posudbi. U skladu s tim sačinjeni su prijedlozi novog standardnog amaterskog ugovora, te Ugovora o djelu za fudbalere na posudbama.

### 3. PRAVILNIK O REGISTRACIJI, STATUSU I TRANSFERU IGRAČA

Trenutni pravilnik, koji je na snazi u bh. fudbalu, nije u potpunosti usklađen s propisima FIFA-e, te je potrebno izvršiti brojne izmjene u dopune. U proteklom periodu usvojene su određene dopune, kojima su se FIFA pravila približila domaćem fudbalu, ali postoje dodatni mehanizmi i odredbe koje se moraju izmijeniti, odnosno promijeniti i usvojiti, kako bi domaći pravilnik, bio u cijelosti usklađen s međunarodnim pravilima. Sindikat profesionalnih fudbalera u Bosni i Hercegovini pripremio je odgovarajuće izmjene i dopune pomenutog dokumenta, kako bi se profesionalni i amaterski fudbal u cijelosti približio FIFA pravilima.

#### AKTIVNOSTI:

- Usvajanje sačinjenog prijedloga izmjena i dopuna pravilnika o registraciji, statusu i transferu igrača NFSBiH.

### 4. TAKSIRANJE RADA KOMISIJA

Rad komisija za registraciju, status i transfer igrača se plaća, a taj trošak snose igrači. Ne postoje dokumenti koji uređuju ovu oblast, te se iznos taksi razlikuje od registracionog saveza do registracionog Saveza. Inicijativa Sindikata profesionalnih fudbalera u Bosni i Hercegovini jeste da se igrači, kojima se duguje tri ili više plata oslobode plaćanja taksi. Rad pojedinih komisija iznosi 500,00 KM/ 250,00 EUR, što je poprilično visok iznos, koji je za brojne igrače skupo. Iznosi taksi za rad komisija se razlikuju od Saveza do Saveza.

#### AKTIVNOSTI:

- Pravljenje i usvajanje pravilnika o taksama registracijskih, entitetskih i komisija NFSBiH, koji će regulisati iznose taksi svih nivoa bh. fudbala.
- Pravljenje i usvajanje odluke Izvršnog odbora NFSBiH o kategorijama koje su oslobođene plaćanja taksi za rad komisija.

Potrebno je napraviti odgovarajuća pravila, koje će definisati ovu oblast. Prijedlog SPFBiH jeste da rad kantonalnih/ područnih komisija iznosi 300,00 KM, rad entitetskih komisija FBiH/ RS 400,00 KM, a komisija NFSBiH u dijelu registracije, statusa i transfera igrača 500,00 KM, bez prava odstupanja pojedinih kantonalnih/ područnih Saveza. Također, zasebnom odlukom Izvršnog odbora NFSBiH potrebno je osloboditi plaćanja takse one pojedince koji 3 mjeseca nisu dobili svoju platu ili su duže od 3 mjeseca bez kluba, odnosno profesionalnog angažmana.

***Podsjećanja radi, FIFA igračima omogućava besplatno rješavanje sporova.***

## 5. PROFESIONALIZACIJA NIŽIH LIGA

**Prvi rang bh. fudbala je profesionalan.**

**1. Lige Federacije BiH i 1. Liga RS-a nisu profesionalne lige.**

**Sindikata profesionalnih fudbalera u Bosni i Hercegovini zalaže se za profesionalizaciju drugih rangova takmičenja, na postepen način.**

Namjera jeste da u takmičarskoj sezoni 2023/24 ovi rangovi takmičenja budu u cijelosti profesionalni, a prethodno da se u sezonama 2021/22 i 2022/23 postepenim izmjenama pravila takmičenja uvedu obaveze od 10, a kasnije 15 profesionalnih igrača. Tako, 32 klubova bi bila u obavezi profesionalizirati svoje pogone, te je svrha ove aktivnosti korisna i za klubove i za igrače, s obzirom na to da klubovi svoje poslovanje uvode pod zakonske okvire, što je intencija svakog pravnog subjekta.

### AKTIVNOSTI:

- Pravljenje unificiranog plana razvoja drugih rangova takmičenja u bh. Fudbalu 2021-25. s aspekta ugovorno pravnih odnosa između klubova i igrača i samih pravila takmičenja.
- Pravljenje i usvajanje izmjena i dopuna domaćeg RSTP-a u vidu postepenog uvođenja obaveze profesionalnih igrača u smislu minimalnog broja igrača za određenu sezonu.
- Pravljenje i usvajanje izmjena i dopuna pravilnika o takmičenjima, te pravila entitetskih Saveza u dijelu organizacije takmičenja.

## 6. ŽENSKI FUDBAL - Ugovorna liga/ Postepena profesionalizacija

**Elitni rang takmičenja ženskog fudbala u Bosni i Hercegovini nije profesionalan niti amaterski. Igračice Premijer lige BiH za žene nemaju prava.**

Zaključno sa sezonom 2023/24 potrebno je postepeno regulirati ovu ligu. Prije svega, Sindikat profesionalnih fudbalera u Bosni i Hercegovini se zalaže da od takmičarske sezone 2021/21 liga postane amaterska, što bi značilo da bi klubovi bili obavezni igračicama osigurati minimalne uvjete kroz pojačanu ishranu, sportsku opremu, prijevoz, medicinsku zaštitu i osiguranje od povreda. Također, amaterski ugovorni status omogućio bi izmjenama pravila i igračicama priliku da kroz komisije za registraciju status i transfer igrača potražuju svoja prava ako s ona ugrožena.

Postepenom profesionalizacijom, namjera je u četverogodišnjem periodu uvesti minimalnu brojku profesionalnih igračica u jednom klubu, a prijedlog Sindikat profesionalnih fudbalera u Bosni i Hercegovini jeste da 50% igračica u Premijer ligi BiH za žene od sezone 2023/24 budu profesionalne.

### AKTIVNOSTI:

- Pravljenje unificiranog plana razvoja ženskog, klupskog takmičenja u bh. Fudbalu 2021-25. s aspekta ugovorno pravnih odnosa između klubova i igračica i samih pravila takmičenja.
- Pravljenje i usvajanje izmjena i dopuna domaćeg RSTP-a u vidu postepenog uvođenja obaveze profesionalnih igračica u smislu minimalnog broja igračica za određenu sezonu.

## 7. POLOŽAJ TRENERA

**Bivši igrači, koji se odluče baviti trenerskim pozivom, u bh. fudbalu nemaju prava.**

**Treneri nemaju standardni ugovor, niti se za njihov angažman u klubu zahtjeva ugovor, odnosno zasnovan radni odnos što je suprotno zakonima države.**



Kako bi se unaprijedio položaj trenera, prije svega potrebno je izmijeniti Pravilnik o trenerima, koji će klubove obavezati da zasnuju radni odnos s trenerima, a standardni ugovorom bi se taj radni odnos dodatno osnažio s položaja trenera. Izmjenama pomenutog Pravilnika, trenerima se mora omogućiti potraživanje svojih prava putem komisija Saveza, a ne redovnim sudskim putem kao do sada, s obzirom na to da se oni školuju u Savezu, plaćaju veliki novac za to, a nemaju nikakva prava.

### AKTIVNOSTI:

- Pravljenje unificiranog standardnog ugovora za trenere Premijer lige BiH, trenere asistente i specijaliste.
- Pravljenje i usvajanje izmjena i dopuna pravilnika o licenciranju za Premijer ligu BiH u vidu obavezne kategorizacije trenera, trenera asistenata i specijalista kao kategorije zahvaćene postupkom licenciranja.
- Pravljenje i usvajanje izmjena i dopuna pravilnika o trenerima NFSBiH u dijelu omogućavanja trenerima da svoja prava ostvare putem komisija i sportskih sudova unutar BiH.
- Pravljenje i usvajanje izmjena i dopuna domaćeg RSTP-a u dijelu omogućavanja trenerima da ostvare svoja prava.

## 8. TAKMIČARSKI KALENDAR I PRELAZNI ROK

**Takmičarski kalendar i sistem žrijeba bh. fudbala funkcionaru po zastarjelom sistemu, koji često ne predstavlja idealno rješenje. Svjedoci smo da takmičarski kalendar nije sinhronizovan niti usaglašen s medicinskom strukom kada je u pitanju opterećenje za igrače, a dnevni termini utakmica po ljetnom vremenu dodatno otežavaju uvjete igranja i usporavaju oporavak.**

Isto se može reći i kada je u pitanju prelazni rok. Bosna i Hercegovina nema usklađen prelazni rok s praksom brojnih, inostranih država, što u velikom izmasu utiče na mobilnost igrača. Sindikat profesionalnih fudbalera u Bosni i Hercegovini se zalaže za unificiranje kalendara takmičenja, termine odigravanja utakmica koji neće ugrožavati zdravlje igrača i trajanje prelaznog roka usklađeno s međunarodnim standardima.

### AKTIVNOSTI:

- Dostavljanje prijedloga i usvajanja istog o fiksnim terminima prijelaznog roka/ registracijskog perioda u Premijer ligi BiH, a koji će poput evropske prakse trajati između 45 i 60 dana.

## 9. UDRUŽENJE PREMIJERLIGAŠA/ KOLEKTIVNO PREGOVARANJE/ INTERNI SPORAZUMU O MINIMALNIM UVJETIMA

*Igrači su organizirani kroz Sindikat, a klubovi, kao poslodavaoci nemaju svoju zajedničku organizaciju.*

Sindikata profesionalnih fudbalera u Bosni i Hercegovini podržava u potpunosti sve inicijative i trenutne aktivnosti između klubova, na putu formiranja njihovog Udruženja. Takvo Udruženje predstavljalo bi legalnog partnera na putu sklapanja kolektivnog ugovora za sve bh igrače, kako bi u cijelosti uredili ugovorno pravne odnose između klubova i igrača, a do tada Sindikat profesionalni fudbalera u Bosni i Hercegovini obavlja sastanke i pregovore s pojedinačnim klubovima s ciljem dogovora o potpisivanju internih sporazuma o minimalnim uvjetima profesionalnog bavljenja fudbalom.

### AKTIVNOSTI:

- *Pripremanje međusobnog sporazuma o saradnji i regulisanju međusobnih odnosa Udruženja/Unije premijerligaša i SPFBiH.*
- *Pripremanje prvog kolektivnog ugovora između poslodavaoca u bh. fudbalu, i budućeg Udruženja/ Unije premijerligaša i SPFBiH.*

## 10. PROMJENA ZAKONSKE REGULATIVE / ZAKON O SPORTU & ZAKONI O POREZIMA

*Bosna i Hercegovina nema uređen sport na državnom nivou kada je u pitanju zakonska regulativa.*

*Potrebno je usvojiti entitetske zakone, te u konačnici i zakon na nivou države.*

*Također, potrebno je izmijeniti Zakon o Doprinosima, Zakon o porezu na Dohodak i Zakon o porezu na dobit, kako bi se sport uspio izboriti sa svim izazovima.*

Status profesionalnog sportiste mora biti definiran u prethodno pomenutim poreskim zakonima, odnosno sportskim udruženjima omogućiti umanjeno plaćanje nameta za svoje profesionalce. Potrebno je omogućiti veći protok novca među klubovima, te po smanjenim stopama odobriti oporezivanje dobiti. Sindikat profesionalnih fudbalera u Bosni i Hercegovini pripremio je zakonske prijedloge, izmjene i dopune postojećih zakona o porezima, te se kroz dijalog s političkim partijama bori za usvajanje istih.

### AKTIVNOSTI:

- **Pripremanje prijedloga izmjena i dopuna Zakona o doprinosima, Zakona o porezu na dohodak i Zakona o porezu na dobit u dijelu sporta, odnosno sportskih Udruženja.**
- **Pripremanje prijedloga izmjena i dopuna Zakona o sportu FBiH.**
- **Pripremanje prijedloga izmjena i dopuna Zakona o sportu RS.**
- **Pripremanje prijedloga Zakona o sportu BiH.**
- **Političko pregovaranje i lobiranje za pomenute prijedloge.**

**Sindikata profesionalnih fudbalera BiH**  
**Obala Kulina Bana 1**  
**71000 Sarajevo**

**[www.spfbih.ba](http://www.spfbih.ba)**  
**[sindikatpfbih@gmail.com](mailto:sindikatpfbih@gmail.com)**  
**[info@spfbih.ba](mailto:info@spfbih.ba)**